

È da saper. Il Serenissimo fo in Conseio di X in camera di scarlati, et non stà bene, è molto fiaco, *tamen* stete fino hore do de note.

A dì 21, Sabado, fo S. Tomà. Il Colegio reduto pur da basso; il Serenissimo non vene, ha hauto mal assai, et fato Colegio de alcuni medici, *videlicet* maistro Marin Brocardo et maistro Valerio di Pexaro et li soi soliti, fo terminà farlo star in quiete, et veder quello sarà.

Da poi disnar fo Pregadi, vicedoxe sier Zuan Alvise Duodo, lete poche letere, qual saranno qui avanti.

Fu posto, per sier Alvise Barbaro, sier Gasparo Contarini consieri, sier Lunardo da Mula, sier Francesco Erizo, sier Alexandro Zorzi cai di XL et sier Lunardo Emo savio dil Conseio: una parte fata notar per loro Cai di XL zerca dar punishment de la vita a quel roberano da ducati 200 in suso, *ut in parte*, et leta, il resto de Savi non la lasso balotar, dicendo volerla consultar meio.

Fu posto, per sier Urban Bolani, sier Polo Contarini, sier Anzolo Corer proveditori sora le pompe quali hanno *etiam* el cargo sora i fuogi, atento non è più scale, sechi, badili, manere etc. per le contrade, però sia preso per far il dito effeto tuti *indifferenter* pagino soldo uno per ducato de quello hano di stabile in questa cità de qualunque sorta se sia per una volta, da esser tolti in nota ai X Savi in termine de zorni 5, et siano comprà le robe, et dà a li piovani de le contrade con certa condition, *ut in parte*, la qual autorità li fo data per el Conseio di X nel 1505 a dì 3 dezembrio. Fu presa. Ave: 117, 57, 12.

Fu posto, per li Savi, una parte molto longa: scriver per le terre che se scuodi l'imprestado di le cità per tuto zener senza don et senza pena poi con pena 10 per 100. Et sier Jacomo Boldù, è proveditor fuora per scuoder, scuodi dove è deputato, et sier Marco Contarini fo eletto a Verona et di là vadi a far dito effeto. *Item*, li debitori dil clero siano fati pagar, vender li sequestri *ut in parte*, ma non meteno scuoder con 10 per 100 dil cavedal; et cussì scuodi dal clero li governadori de le intrade. Ave: 156, 21, 8.

Fu posto, per li diti, una parte sia scritto a Verona alcuni dil clero se vol doler sia tansà tropo, che elezino deputadi li aldino, non sminuisa la quantità, ma cresa a uno altro, *ut in parte*. Et questo per tuto fevrer. Ave: 156, 11, 3.

Fu posto, per li Consieri et tuto el Colegio suspender per do anni li debiti hanno le monache di

San Roco et Santa Margarita in nome di alcune done di Quartari, *ut in suplicatione* per tanse et decime. Fu presa. Ave: 159, 4, 12.

Fu posto, per i Consieri, Cai di XL et Savi tuti, poi leto una suplicatione de frati di Sant' Anzolo de Corfù, justa quello terminò sier Vettor Soranzo el cavalier procurator capitano zeneral di mar, che ogni mexe li fazi dar mozeti 200 salì al prefato convento, et questo per haver fato ruinar el suo monasterio per far el fosso di la tera. La qual parte fu messa a dì 14 novembrio passato et balotata do volte, non have il numero. Hora mò ave 141, 10, 9 et fu presa.

Fu posto, per li Savi dil Conseio etc.

Fu posto, per li Savi, elezer *de praesenti* per 130 scurtinio per do anni uno proveditor sora le fabbriche di Trevixo, con ducati 25 al mexe di danari deputadi a le fabbriche predite, et quel sarà electo parti per tuto zener proximo. Ave: 126, 53, 6. Fu presa.

Fu posto per li diti, excepto sier Francesco Venier savio a Terra ferma, elezer el primo Pregadi per scurtinio uno proveditor sora le fabbriche de Urzinuovi, con ducati 20 al mexe per spexe per do anni *ut in parte*, et sia pagà di danari de la fabrica, et parti per tuto zener proximo. Ave: 94, 87, 1. Fu presa.

Fu posto, per li Savi diti, che una deferentia fra la comunità de Verona et quelli dil mestier de la lana, sia aldita, con li soi avvocati nel Colegio nostro et expedita a bossoli et balote per li do terzi de le balote, la dita regulation dil mestier di la lana sia expedita. Ave: 142, 16, 10.

Fu posto, per li Consieri, Cai de XL et Savi che a Nicolò Calenzi fiol qu. Zuan Calenzi capo di stratioti, venuto hora di Napoli de Romania, qual ha patente de ducati 5 per paga, li sia confirmata in ducati 4 a la Camera de Candia a page 4 a l'anno. Et balotà do volte ave: 105, 9, 13; la seconda: 128, 8, 16. Et fu presa.

Fu posto per li Savi, che a Zorzi de Grisoni da Sebenico, nipote dil reverendo prè Zorzi abate qual ha 10 sorele, li siano dati cavali do, uno per lui, l'altro per il suo servitor et posto in quelle compagnie è a Sibinico a raxon di ducati 3 per cavallo a page 8 a l'anno. Ave: 125, 15, 16. Et fu presa.

Fu posto, per li diti, atento Borgese dal Borgo, qual era capitano de fanti et havia provision a Pa-